

საქართველოს შრომის, ჯანმრთელობისა და სოციალური დაცვის მინისტრის

ბრძანება №01-78/ნ
2014 წლის 30 ოქტომბერი

ქ. თბილისი

„პროფილაქტიკური აცრების ეროვნული კალენდრის, აგრეთვე იმუნიზაციის მართვის წესებისა და საჭირო სააღრიცხვო-საანგარიშგებო ფორმების დამტკიცების შესახებ“ საქართველოს შრომის, ჯანმრთელობისა და სოციალური დაცვის მინისტრის 2010 წლის 25 ივნისის №183/ნ ბრძანებაში ცვლილების შეტანის თაობაზე

„ნორმატიული აქტების შესახებ“ საქართველოს კანონის მე-20 მუხლის მე-4 პუნქტის შესაბამისად, ვბრძანებ:

მუხლი 1

„პროფილაქტიკური აცრების ეროვნული კალენდრის, აგრეთვე იმუნიზაციის მართვის წესებისა და საჭირო სააღრიცხვო-საანგარიშგებო ფორმების დამტკიცების შესახებ“ საქართველოს შრომის, ჯანმრთელობისა და სოციალური დაცვის მინისტრის 2010 წლის 25 ივნისის №183/ნ ბრძანებაში (სსმ III, 28.06.2010 №75 მუხ.1100) შეტანილ იქნეს შემდეგი ცვლილება:

1. ბრძანების პირველი პუნქტით დამტკიცებული სააღრიცხვო-საანგარიშგებო ფორმები (№№ 1.3; 063; 1.4; 1.8; 1.9; 2.3; 2.8; 2.9; 2.10) ჩამოყალიბდეს თანდართული რედაქციით.
2. ბრძანებით დამტკიცებული დანართის („პროფილაქტიკური აცრების ეროვნული კალენდარი“ და იმუნიზაციის მართვის წესები):

ა) მე-3 მუხლი ჩამოყალიბდეს შემდეგი რედაქციით:

„მუხლი 3. პროფილაქტიკური აცრების ეროვნული კალენდარი

ასაკი ვაქცინა	0-12 საათი	0-5 დღე	2 თვე	3 თვე	4 თვე	12 თვე	18 თვე	5 წელი	14 წელი
1 ბცკ (BCG)		X							
2 ჰეპ B (HepB)	X								
3 დიფთერია-ტეტანუსი-ყივანახველა-ჰეპ B- ჰიბ (DPT-HepB-Hib)			X	X	X				
4 დიფთერია-ტეტანუსი-ყივანახველა (DPT)							X		
5 ოპვ/იპვ (OPV/IPV)			X	X	X		X	X	
6 წითელა-წითურა-ყბაყურა (MMR)						X		X	
7 დიფთერია-ტეტანუსი (DT)								X	
8 ტეტანუსი-დიფთერია (Td)*									X
9 როტავირუსული ვაქცინა (Rota)			X	X					
10 პნევმოკოკური კონიუგირებული ვაქცინა (PCV)			X	X		X			



11	ადამიანის პაპილომავირუსული (HPV)	სახელმწიფო პროგრამის ფარგლებში აცრების დაწყების კონკრეტული წელი და აცრადამატებული ასაკობრივი კონტინგენტები განისაზღვრება სშჯსდ სამინისტროს ცალკე ბრძანებით
12	ჩუტყვავილა (VZV)	

შენიშვნა: * ტდ - შემდეგ ყოველ მე-10 წელს, 55 წლის ასაკამდე.“.

ბ) მე-4 მუხლის:

ბ.ა) მე-7 პუნქტი ჩამოყალიბდეს შემდეგი რედაქციით:

„7. პნევმოკოკური ინფექციების საწინააღმდეგო თხევადი, პოლისაქარიდული კონიუგირებული ვაქცინით (ადსორბირებული) აცრა იწყება 2 თვის ასაკიდან და მთავრდება 12 თვის ასაკში, კურსი შედგება 3 ინექციისგან – 2 პირველადი ვაქცინაციისა და ერთი ბუსტერ დოზისაგან. აცრა კეთდება კუნთში, ბარძაყის ანტეროლატერალურ ზედაპირზე, ერთი საინექციო დოზა შეადგენს 0,5 მლ-ს. ამასთან, პნევმოკოკური ვაქცინის:

- ა) პირველი დოზა უნდა გაკეთდეს 2 თვის ასაკში;
- ბ) მეორე დოზა უნდა გაკეთდეს 3 თვის ასაკში;
- გ) მესამე დოზა უნდა გაკეთდეს 12 თვის ასაკში;
- დ) პირველ და მეორე აცრას შორის დასაშვები მინიმალური ინტერვალი არის 4 კვირა;
- ე) მეორე და მესამე აცრას შორის დასაშვები მინიმალური ინტერვალი არის 6 თვე;
- ვ) მესამე აცრა უნდა გაკეთდეს არანაკლებ 12 თვის და არა უგვიანეს 15 თვის ასაკისა.“;

ბ.ბ) მე-7 პუნქტის შემდეგ დამატოს შემდეგი შინაარსის 7¹ პუნქტი:

„7¹. დაგვიანებით დაწყებული ვაქცინაციის შემთხვევაში:

ა) 7–11 თვის ჩვილების ვაქცინაციის კურსი შედგება 3 ინექციისგან – 2 პირველადი ვაქცინაციისგან და მესამე დამატებითი აცრისგან. პირველ და მეორე დოზას შორის რეკომენდებული მინიმალური ინტერვალია 4 კვირა, ხოლო მესამე დამატებითი დოზის გაკეთება რეკომენდებულია სიცოცხლის მეორე წელს, ბოლო აცრიდან 2 თვის მინიმალური ინტერვალით 15 თვის ასაკამდე.

ბ) თუ რაიმე მიზეზის გამო, ბავშვს აცრა არ გაუკეთდა 12 თვის ასაკამდე, 12-23 თვის ასაკის ბავშვებისათვის ვაქცინაციის კურსი არის ორ დოზიანი, ერთი ასაცრელი დოზა შეადგენს 0,5 მლ. დოზებს შორის მინიმალური ინტერვალი არის 8 კვირა;

გ) უფროსი ასაკის ბავშვებში აცრა კეთდება მხრის გარეთა ზედაპირზე დელტისებურ კუნთში.“.

გ) მე-12 მუხლით განსაზღვრულ ცხრილს მე-10 პუნქტის შემდეგ დამატოს მე-11 პუნქტი შემდეგი რედაქციით:

„

11.	პნევმოკოკური კონიუგირებული ვაქცინა (PCV)	უკუჩვენება*
		მძიმე ალერგიული რეაქცია ვაქცინის წინა დოზაზე ან ვაქცინის კომპონენტზე;
		გაფრთხილება*
		ვაქცინაცია არ ტარდება 6 კვირაზე ნაკლებ ასაკში;
		ზომიერი ან მძიმე მწვავე დაავადება ტემპერატურით და/ან მის გარეშე – გადადეთ ვაქცინაცია გამოჯანმრთელებამდე!



*პნევმოკოკურ კონიუგირებულ ვაქცინაზე ვრცელდება ამ წესის მე-12 მუხლის პირველ პუნქტში აღნიშნული უკუჩვენებები და გაფრთხილებები

..

დ) მე-14 მუხლის მე-2 პუნქტს დაემატოს „ნ“ და „ო“ ქვეპუნქტები შემდეგი რედაქციით:
„ნ) პნევმოკოკური კონიუგირებული ვაქცინის ფლაკონის გახსნიდან გასულია 6 საათი და მეტი (რადგანაც ვაქცინა არ შეიცავს კონსერვანტებს);

ო) პნევმოკოკური კონიუგირებული ვაქცინის ფლაკონზე არ არის მითითებული ფლაკონის გახსნის თარიღი, საათი და წუთი.“.

მუხლი 2

ბრძანება ამოქმედდეს გამოქვეყნებისთანავე.

საქართველოს შრომის,
ჯანმრთელობისა და სოციალური
დაცვის მინისტრი

დავით სერგეენკო

